

Mensahe 2

Manunod sa Malangkobon-sa-tanan nga Cristo isip Maayong Yuta pinaagi sa Pagpaminaw sa Mga Pulong Niya sa Pagtambag ug Pasidaan ug sa Pagdawat sa Iyang Pagbansay Pag-usab aron Mabag-o ang Tawo Nato sa Sulod Adlaw-adlaw

Basahong Kasulatan: Heb. 3:12, 16-19; 4:2, 6; 11:1; 1 Cor. 10:1-14; Sal. 106:24-25; Deut. 8:3; Mat. 4:4

- I. Ang tumong sa pagtawag sa Dios sa mga anak sa Israel aron man makasulod sila sa gisaad nga yuta ug makapahimulos sa kadato niini aron maestablisar nila ang gingharian sa Dios ug mahimong pagpadayag sa Dios dinhi sa yuta—Exo. 3:8, 14, 17:**
- A. Bisan tuod natubos ang tibuok Israel tungod sa pasko, gipahigawas sa pagdaugdaog sa Egipto, ug gidala sa bukid sa Dios aron mapadaygan sa puluy-anan sa Dios, sa tabernaculo, halos silang tanan nangatumba ug nangamatay sa kamingawan, wala makaabot ning tumonga (Heb. 3:7-19) tungod sa ilang daotang mga buhat ug pagkadili-matinuohon.
 - B. Nagtimaan kini nga bisan tuod gitubos na ta ni Cristo, gipagawas na sa paggapos ni Satanas, ug gipadaygan na sa pamatigayon sa Dios, may purohan pa nga dili ta sa makaabot sa tumong sa pagtawag sa Dios kanato, sa ato pa, makasulod ug makapanag-iya sa atong maayong yuta, nga si Cristo, ug makapahimulos sa Iyang kadato alang sa gingharian sa Dios aron mahimo tang pagpadayag Niya karong panahona ug makaapil sa kinahingpitang pagpahimulos kang Cristo sa panahon sa gingharian—Mat. 25:21, 23.
 - C. Si Caleb ug si Josue ray nakaabot sa tumong ug nakasulod sa maayong yuta; sama ni Caleb ug Josue, “magpursigir [gyod tang mga magtutuo sa Bag-ong Tugon] sa tumong” (ang kinahingpitang pagpahimulos ug pagpakabaton kang Cristo) “alang sa ganti” (ang kinahingpitang pagpahimulos kang Cristo sa gingharian sa millennium)—Num. 14:27-30; Fil. 3:12-14:
 - 1. Nagdalag daotang taho ang napulo sa napulog duha ka tawong gipadala ni Moises sa pagpangespiya sa yuta nga nakaingon sa pagbagulbol ug pagsupil sa mga anak sa Israel sa pulong sa Ginoo, apan gisultian nila ni Caleb ug Josue ang tibuok katigoman nga, “Dili lang unta mo mosupil batok ni Jehova, o mahadlok ba sa katawhan sa yuta [ang Anakim], kay tinapay nato sila”—Num. 14:9.
 - 2. Tinapay nato ang pulong sa Dios (Mat. 4:4), kalan-on nato ang pagbuhat sa kabubut-on sa Dios (Juan 4:34), ug tinapay sab nato ang Anakim (Num. 14:9), nga nagrepresentar sa morag dili madaog nga mga kaulangan ug imposibleng mga sitwasyon sa pagpursigir nato ni Cristo aron matukod ang iglesia.
 - 3. Kalan-on nato ang tanang kalisdanan ug pagtintal nga gipadala ni Satanas kanato; kini ang gitudlo-sa-Dios nga palagianan sa espiirituhanong pag-uswag (1 Tim. 4:15-16); kon nagsalig ta sa Ginoo

MGA TALAMDAN SA PAGBANSAY

Mensahe 2 (sumpay)

aron makadaog ug tugotan ang madaogong kinabuhi Niya nga mapadayag kanato, makakaon tag bag-ong kalan-on ug labi pang malagsik (Jos. 14:11-15).

4. Aron makabaton sa nag-amping nga gahom sa Dios, bansayon gyod nato ang atong espiritu sa pagtuo ug sigeng iliso ang atong kasingkasing sa Ginoo nga kinasingkasing tang motuo sa Iyang mga saad (2 Cor. 4:13; 3:16; 1:20), motuo nga nag-uban Siya sa Iyang katawhan, ug motuo nga makahimo kaayo sila sa pagdaog (Jos. 14:12-15; Num. 13:30); itugyan gyod nato ang atong kalag ingog deposito ngadto sa Dios, ang kasaligang Magbubuhay (1 Ped. 4:19), itugyan ang atong kaugalingon Kaniya, ug itugyan Kaniya ang pag-amping sa atong kinabuhi (2 Tim. 1:12).
5. Kon mosalig ta sa Iyang mga saad ug hingpit nga itugyan ang atong kaugalingon Kaniya, maampingan ta sugod ning adlaw hangtod sa adlaw nga mobalik Siya; makahimo Siya sa pagbantay kanato nga dili mapandol ug makapabarog nato atubangan sa Iyang himaya nga walay apan diha sa hilabihan gyong kalipay—Jud. 24.
6. Kon buot tang hingpit nga makapanag-iya ni Cristo nga maayong yuta, magbantay gyod ta basin naa tay daotang kasingkasing sa pagkawalay-pagtuo; ang dili pagtuo sa Ginoo pagsupil man batok Niya—Deut. 1:25-26, 28, 35-39; 9:23; Heb. 3:12, 16-19; 4:2, 6; 11:1; itandi sa 2 Cor. 4:13; Gal. 3:2, 5; Rom. 10:17; Buh. 6:5a; Num. 13:25-33; 14:4-10; 32:11-12; Jos. 14:6-12; 1 Cor. 10:1-13.
7. Kon buot tang hingpit nga makapanag-iya ni Cristo nga maayong yuta, magbantay gyod ta sa mga pagbagulbol (wala makontento ug sekretong mga pagbagutbot, pagmulo, ug pagreklamo); ang pagbagulbol hagawhaw nga pagreklamo, pagbagutbot ug nagmug-ot ang nawong sa kalagot—v. 10; Sal. 106:24-25; Fil. 2:14.

II. Kon buot tang hingpit nga makapanag-iya ni Cristo nga maayong yuta, niingon si apostol Pablo nga “[magpalayo gyod ta] sa pagsimbag mga diosdios” (1 Cor. 10:14), nga nagpasabot sa pagsimbag mga diosdios sa mga anak sa Israel sa pagsimba nila sa nating baka nga bulawan (Exo. 32:1-6):

- A. Ang nating baka nga bulawan diosdios man nga hinimo-sa-tinubos-nga-katawhan sa Dios; ang pagtindog aron magdula pagpasinunot man sa paghudyaka (o banha nga paglingawlingaw); ang diosdios sa atong kasingkasing bisan unsang butang man sa sulod nato nga atong gihigugma labaw sa Ginoo ug nakapuli Niya sa atong kinabuhi (Ezeq. 14:3); isip tinuod nga mga anak sa tinuod nga Dios, abtik gyod natong bantayan ang atong kaugalingon gikan sa mga diosdios (1 Juan 5:21), gikan sa tanang makapuli ni Cristo sa atong kinabuhi.
- B. Mapasidan-an gyod unta ta sa prinsipyo sa nating baka nga bulawan, sa diosdios nga hinimo sa tinubos nga katawhan sa Dios nga naghimo

Mensahe 2 (sumpay)

nilang kampo nga masimbahog diosdios; naglakip sa lima ka prinsipyo ang pagsimbag mga diosdios—1 Cor. 10:5-7:

1. Magdul-ong sa pagsimbag mga diosdios ang pagpatahom-sa-kaugalingon (Exo. 32:1-4; 33:5-6; Gen. 35:1-4); ang Dios maoy katahom nato, ug gipatahom Niya ang iglesia nga balay sa Iyang katahom aron patahomon Siya (Isa. 60:7, 19, 21; Efe. 5:26-27); sa pagpadayag sa atong kaugalingon naay pagbahinbahin, apan sa hiniusang pagpadayag sa Dios, sa diosnong himaya, naay pagkausa (Juan 17:22-24); ang buhat nato mao ang pagkinabuhi nato aron maghimaya, magpadayag sa Dios dinhi sa yuta (v. 4; 1 Cor. 10:31; Isa. 43:7), ug sa pagpamulong nato dili gyod ta magtinguha sa kaugalingon natong himaya pinaagi sa pagsangyaw sa atong kaugalingon, isangyaw hinuon nato si Cristo Jesus nga Ginoo ug ang atong kaugalingon nga mga ulipon aron moalagad sa mga magtutuo (Juan 7:17; 2 Cor. 4:5).
 2. Pag-ilog ni Satanang sa gihatag sa Dios kanato ang pagsimbag mga diosdios aron mausik kini; pag-abusar kini nato sa gihatag sa Dios kanato ug dili paggamit sa mga gasa sa Dios, materyal ug espirituhanon, alang sa tuyo sa Dios; gamiton alang sa pagtukod sa tabernaculo ang bulawang gihatag sa Dios sa mga anak sa Israel pinaagi sa mga Egiptohanon sa wala pa sila mogula sa Egipto; apan, sa wala pa magamit ang bulawan alang sa tuyo sa Dios, giilog na kini ni Satanang ug gigamit sa katawhan sa Dios sa paghimog diosdios—Exo. 11:2-3; 12:35-36; 25:2-8; 35:4-9.
 3. Ang pagsimbag mga diosdios pagsimba man sa mga butang nga gipahimuslan nato, ang pagsimba sa kalingawan; oo, nagpahimuslos ta sa Ginoo, apan dili kini kalibotanong kalingawan—32:6, 18-19; itandi sa Sal. 36:8-9:
 - a. Gipasidan-an ni Pablo ang mga taga-Corinto sa ingon niini: “Dili sab unta mo mahimong mga tigsimbag diosdios, sama sa gibuhad sa uban nila; ingon sa nasulat, ‘Nanglingkod ang mga tawo aron mangaon ug manginom, ug nanindog aron magdula’” (1 Cor. 10:7; Exo. 32:6); niingon si C. A. Coates nga nagdula sila; inigka-Sabado ug Dominggo daghang tawo ang nagtagad lang sa pagkaon, pag-inom, ug pagdula.
 - b. *Ang pagdula* paglingawlingaw, pagpasiaw, ug pag-inartista, pagpasundayag, o pagpamulong nga dili seryoso; *ang pagdula* paggawi nga masiwon ug walay pagpugong; pagsadya kini, sa ato pa, pagkalipay pag-ayo.
 4. Sa pagsimbag mga diosdios naay pagpakaaron-ingon sa pagsimba sa tinuod nga Dios—vv. 4-6; 1 Hari 12:26-30; itandi sa Mat. 4:8-11; Juan 4:23-24.
 5. Sa pagsimbag mga diosdios naay sambog sa pagsimba—Exo. 32:4-6, 21-24; itandi sa 1 Cor. 3:12.
- C. Sa nakasimba na ang mga anak sa Israel sa nating baka nga bulawan,

Mensahe 2 (sumpay)

nakaamgo si Moises nga dili na maanaa sa taliwala sa katawhan ang presensya sa Ginoo, busa gikuha niya ang iyang tolda ug gipatindog kini nga medyo layo sa kampo; nahimo dayong tolda sa Dios ang iyang tolda, kay tua man didto ang presensya sa Ginoo ug ang pag-pamulong—Exo. 33:7-11.

- D. Sa gikuha na ni Moises ang iyang tolda ug gibulag kini sa kampong masimbahog mga diosdios, nakigsulti ang Ginoo kaniya sa nawong ug nawong, ingon sa tawong nakigsulti sa iyang kauban (vv. 11, 14); magkauban, magkasosyo, kompanyero ang Dios ug si Moises, nga nalambigit sa parehong trabaho ug pareha rag interes sa dakong pati-gayon; suod si Moises sa Dios, ug tawo siya nga nasayod sa kasing-kasing sa Dios, uyon sa kasingkasing sa Dios, ug makatandog sa kasingkasing sa Dios.

III. Gihatag sa Dios pinaagi ni Moises ang pagbansay pag-usab ngadto sa bag-ong kaliwatan sa mga anak sa Israel human sa taas nga paglibod-suroy nila, aron mag-andam kanila nga mosulod sa maayong yuta nga gisaad sa Dios ug manunod niini isip katigayonan nila; sa nangamatay na ang unang kaliwatan, gawas nila ni Caleb ug Josue, andam nang mosulod sa maayong yuta ang ikaduhang kaliwatan ug manag-iyang niini:

- A. Naghulagway sa daang tawo nato ang unang kaliwatan; naghulagway sa bag-ong tawo nato ang ikaduhang kaliwatan—Deut. 2:14; 8:6-10; Exo. 3:8; Col. 1:12:
1. Kinahanglan tang motubo sa kinabuhi hangtod hingpit tang maka-panag-iyang ug makapahimulos ni Cristo nga malangkobon-sa-tanan, ang yutang gisaad sa Dios; ang pagkatransporma pagkamatay man sa daang tawo ug pagtubo sa bag-ong tawo; ang pamatigayon sa Dios pagkadunot man sa daang tawo nato (ang tawo sa gawas) ug pagbag-o adlaw-adlaw sa bag-ong tawo nato (ang tawo sa sulod)—2 Cor. 4:16.
 2. Sa kaluoy ug grasya sa Ginoo, sukad nga naanaa ta sa pahiuli sa Ginoo, gibag-o ta aron motubo ug matransporma ta sa kinabuhi ug makapahimulos ta ni Cristo nga maayong yuta nato alang sa balay ug gingharian sa Dios—3:18; Rom. 12:2.
- B. Mahitabo ang pagkatransporma nato sa kinabuhi sa dihang papuy-on nato ang pulong ni Cristo sa sulod nato sa madagayaon gyod (Col. 3:16); niingon ang Deuteromonio 8:3 nga, “mabuhi ang tawo dili sa tinapay lang, mabuhi hinuon siya sa tanang nigula sa baba ni Jehova”; sa Mateo 4:4 gipulihan ang *tanang* og *matag pulong*:
1. Gininhawa sa Dios ang tanang pulong sa Biblia, ug nagpasabot ni Cristo ang tanan, nga kinatibuk-an sa Pulong sa Dios (Juan 1:1; Bug. 19:13) aron mahimong kinabuhi ug sangkap sa kinabuhi sa katawhan sa Dios; ang mabuhi sa matag pulong nga mogula sa

Mensahe 2 (sumpay)

- baba sa Dios mabuhi man tungod ni Cristo, nga pagkalawas sa diosnong gininhawa (Juan 6:57, 63; 20:22).
2. Kay pagginhawa, pagginhawa-pagawas man sa Dios ang Kasulatan (2 Tim. 3:16), hanggapon gyod nato ang Kasulatan sa pagdawat sa pulong sa Dios pinaagi sa tanang pag-ampo (Efe. 6:17-18); sa pagpanudlo nato sa Biblia, ginhawaon gyod nato pagawas ang Dios ngadto sa mga tawo.
 3. Aron hingpit natong mapanag-iyas si Cristo nga maayong yuta, mininahon gyod nato ang kalunhaw ug kabag-o nato sa Ginoo pinaagi sa pagdawat sa Iyang bag-ong pagpamulong kanato adlaw-adlaw (Lam. 3:22-24; Deut. 34:7; Rom. 7:6; Jer. 15:16); magbantay gyod ta nga laayon sa yuta (Deut. 4:25); nagpasabot ang pulong *laay* “sa pagkawala sa espirituhanong kalunhaw, ug sa pagkahinay sa mga impresyon sa sinugdhan, tungod sa kusog sa batasan, o sa dugay nga pagpuyo sa mao ra nga dapit” (S. R. Driver).
 4. Kon nahigugma ta sa Dios, nagpaubos sa atong kaugalingon, ug moduol sa Ginoo isip buhing pulong diha sa nasulat nga pulong Niya pinaagi sa pag-ampo-basa sa Iyang Pulong, mahimo Siyang giaplikar nga pulong sa Espiritu alang nato; espiritu ug kinabuhi alang nato ang dihadhang mga pulong Niya aron masangkapan ug makakaon ta, matuhopan ta sa pagkamao sa Dios pinaagi sa mga pulong Niya, ug mausa ta sa Dios sa kinabuhi ug kinaiya apan dili sa ranggo sa pagka-Dios aron mahimaya Siya, kun mapadayag Siya—Juan 5:39-40; 6:57, 63; Efe. 5:26-27.

IV. Ang pagbansay pag-usab sa Dios mao ang sugo Niya sa Iyang katawhan sa siyam ka butang:

- A. Mahadlok gyod ta sa Ginoo; ang mahadlok sa Ginoo kana mang mahadlok nga makasilo Niya, mawad-an sa Iyang presensya, ug dili makadawat Niya nga ganti nato sa sunod nga panahon; mahadlok gyod unta ta nga dili mapahiyoman sa Ginoo ning panahona ug dili magantihan Niya sa sunod nga panahon—Prov. 1:1, 7; Efe. 4:30; 2 Cor. 5:9-10.
- B. Maglakaw gyod ta sa mga dalan sa Dios; unsa ngani ang Dios, mao kana ang dalan alang nato; busa, ang pagdawat kon unsa ang Dios ingon nga mga dalan nato ug ang paglakaw ning mga dalana pagkinabuhi man nato sa Dios, pagkinabuhi nato ni Cristo; ang paghimo kang Cristo nga dalan nato pagkinabuhi man Kaniya, ug ang pagkinabuhi Kaniya pagpadayag man Kaniya, pagpadako Kaniya—Juan 14:6; Fil. 1:19-21a.
- C. Higugmaon gyod nato si Ginoong Jesus, nga atong Dios (Juan 20:28); kay gihigugma man ta sa Dios ug gipatumong ang Iyang pagmahal kanato (Deut. 10:15; Jer. 31:3), mobalos gyod unta ta sa paghigugma Kaniya pinaagi sa pagpatumong sa atong pagmahal Kaniya (1 Cor. 2:9).

MGA TALAMDAN SA PAGBANSAY

Mensahe 2 (sumpay)

- D. Higurmaon ug alagaran gyod nato ang Dios sa tibuok natong kasingkasing ug tibuok natong kalag; nadugtong ang atong kasingkasing sa atong espiritu, kay ang atong konsensya, nga kagamitan sa atong espiritu (Rom. 9:1), kagamitan man sab sa atong kasingkasing (Heb. 10:22); tungod niana, ang paghigurma ug pag-alagad nato sa Dios sa tibuok natong kasingkasing ug kalag nagpakita nga gihigurma ug gi-alagaran sab nato Siya sa atong espiritu (Rom. 1:9), nga espiritu sa gugma (2 Tim. 1:7).
- E. Tumanon gyod nato ang mga sugo ug mga tumanon Niya alang sa atong kaayohan; nagpasabot kini nga tumanon gyod nato si Cristo karon nga realidad sa mga sugo sa Dios ug sa kadato ni Cristo nga gipangalagad kanato aron mapanalanginan ta—Deut. 10:13.
- F. Sirkunsisyonan gyod nato ang yamis sa atong kasingkasing, nga nagpasabot nga ilansang nato sa krus ang unod (Gal. 5:24), nga mao ang tanang pagkamao ug nabatonan nato sa natural natong pagkatawo, pinaagi sa pagkinabuhi ug pag-alagad nato diha sa gipanganak pag-usab nga espiritu nato (Rom. 1:9; 2:28-29; 7:6; 8:4, 16); naghimo kini natong tinuod nga “sirkunsisyon, ang mga tawong nag-alagad pinaagi sa Espiritu sa Dios ug nagpasigarbo diha ni Cristo Jesus ug walay pagsalig sa unod” (Fil. 3:3).
- G. Dili na gyod unta ta magpatikig-sa-liog; nagtimaan ang pagkatikig natog liog sa gahian ug masupilong pagbuot nato (Deut. 31:27), nga buntogon ug banhawon gyod ni Cristo pinaagi Niya nga Espiritung nagtransporma aron mahimo natong katahom sa pagsugot nato Ka-niya (A. A. 1:10; Fil. 2:13).
- H. Kuptan gyod nato si Cristo ingon nga tibuok sugo sa Dios; malig-onan ug madasig dayon ta nga mopadayon aron manag-iya ni Cristo nga maayong yuta nato (Deut. 11:8, 24); nagpasabot kini nga batonan gyod nato si Cristo (Fil. 3:8); labot pa, malugwayan ang atong mga adlaw diha ni Cristo (Deut. 11:9, 21), maanaa nato ang mga mata sa Dios aron mag-atiman nato ug magpanalangin nato sa Iyang presensya (v. 12), ug makapahimulos ta sa langitnong ulan, sa pagbisbis sa Espiritu aron makaani og abot ni Cristo (vv. 14-15).
- I. “Pinaagi sa Iyang ngalan manumpa ka. Siya ang imong pagdayeg ug Siya ang imong Dios, nga nagbuhat ning dagko ug makalilisang nga mga butang alang nimo, nga nakita sa imong mga mata” (10:20b-21); sa mga pamulong ug kasinatian sa Bag-ong Tugon, nagpasabot kini nga motawag ta sa ngalan sa Ginoo aron makapahimulos ta sa organicong kaluwasan Niya ug sa dili matugkad nga kadato Niya (Rom. 10:12-13).